

**COMUNICATO n. 2591 del 22/09/2025**

**L toch de la Sp 238 enterressà da lurieres per slarièr e meter en segurezza la strèda**

## **L president Fugatti a vardèr l cantier su la strèda de Muncion, te Fascia**

**[Ladino]** L president de la Provinzia autonoma de Trent, Maurizio Fugatti, l à fat n soralech sul cantier envià via per meter en segurezza la Strèda provinzièla 238 de Muncion, tel Comun de San Giovanni di Fassa – Sèn Jan. L intervent, scomenzà de setember del 2025 e dassen spetà da la comunanza del post, l perveit de slarièr l’utèda al chilometer 0+871, acioche posse passèr en segurezza mesi gregn, auto e la sacotanta jent che va co la roda su per strèda envers la Val de Vaiolet.

**“I lurieres de retifica – l à dit l president – i é debeseegn per arseguirèr na maor segurezza al trafich. Sion do a rejonèr de n toch de strèda olache passa n muion de jent co la roda, vedù che n’outa l é stat tout ite ence te na tapa del Giro d’Italia. L intervent per meter en segurezza chest toch de strèda l vegn tout ite te na vijion più grana de atenzion e cura per duc i raions de nosc teritorie”.**

I lurieres, finanzié con na suma en dut de 580.458 euro, i à l obietif de adatèr la strèda acioche posse passèr ence mesi gregn, e che se posse tor demez l diviet e no ge vobie ogne outa fèr deroghes percheche i posse passèr se l é besegn. L projet – desche prezisà dal enj. Massimiliano Tatti, de l’Agenzia provinzièla per la operes publiche (Apop) – l perveit de slarièr l’utèda, che l’arà n rai mesan de 6 metres, col ciavèr sunsora la strèda e fèr su na neva fondazion de sostegn su micropèi sotite strèda. I lurieres i vegnarà lascé su de november per la paussa da d’invern e i scomenzerà da nef chest’aisciuda che vegn.

Per l Ombolt de San Giovanni di Fassa – Sèn Jan, Giulio Florian, se trata de “n projet restà te crigna tropes egn che zacan l vegn metù a jir de gra a la Jonta Fugatti”. “Se trata – l à dit amò apede – de na opera de gran emportanza per nosc raion: zacan dajon na responeta concreta a n problem de vibilità dassen senester per l coleament co la Val de Vaiolet, Ciampedie e la viles de Ronch e Muncion”.

A veder l cantier l era ence l Procurador del Comun General de Fascia, Edoardo Felicetti, la Vizeprocuradora, Lara Battisti, e l conseier provinzièl Luca Guglielmi.

“L intervent – l’à specificà Battisti – l é spetà èrs da passa vint egn da la jent de Muncion. Anchecondì l é gran limitazions per l passaje di mesi gregn, con dificoltà per l reforniment de la uties e empedimenc tel svilup del paisc.

Col slarièr e meter en segurezza la strèda zacan sarà possibol arseguirèr n passaje più sorì e segur a duc i mesi, ence via per d’invern.”

L Conseier Guglielmi l à palesà sia sodesfazion per chesta opera e l à sottrissà che l intervent l era “n empegn che aee tout su te la legislatura passèda e che l vegn concretisà de gra al finanziament de la Jonta provinzièla per ge dèr na responeta concreta ai sentadins de Muncion e ai ghes che passa per chesta area”.

Desèria [chiò](#) l service video

**Traduzion di Servijes Linguistics e Culturèi del Comun general de Fascia**

(cdt)